



*Ioseph visitant ses freres aux champs , est par eux mis en la cisterne ;  
 Et peu apres vendu aux Ismaélites.*

**OMME** les freres de Ioseph païssoient les troupeaux és champs de Sichem , Iacob dit au petit Ioseph , Va voir tes freres , & leurs troupeaux , s'ils se portent bien , & m'en apporte nouvelles. Ioseph alla donc de Sichem en Dothaim , pour accomplir sa charge. Or les freres le voyans venir de loin , conspirerent sa mort , disans ; Voicy le maistre Songeur qui vient , tuons-le ou le iettons en la cisterne , puis nous dirons à nostre pere , La mauuaise beste l'a deuoré : mais Ruben les empescha , & dit , Ne respandons point nostre sang , mais il le faut ietter en la cisterne du desert , vuide d'eau. Ce qui fut fait , apres l'auoir dépoüillé de sa robe de couleur : puis ils s'assirent pour manger , & éleuans leurs yeux apperceurent des marchands Ismaélites venans de Galaad ; lors par l'aduis de Iuda , Ioseph leur fut vendu pour trente pieces d'argent , & mené en Egypte , dont Ruben fut attristé. Or ayans teint la robe de Ioseph en sang , ils la porterent à leur pere , qui creut que la mauuaise beste l'eust deuoré ; dont il déchiroit ses vestemens , faisant deüil si grand , qu'il ne vouloit recevoir consolation , disant , Je descendray lamentant en la fosse avec mon fils Ioseph.